



Anthon Frederiksen,
Inatsisartunut ilaasortaq
Inatsisartut
/HER

Akissut § 37-224 tunisineq akuersissutillu pillugu

Inatsisartut suleriaasianni § 37, imm. 1 naapertorlugu aalisarneq pillugu
apeqqutigineqarpoq. Apeqqut uannut akisassanngorlugu innersuussutigineqarpoq.

11-09-2015
Sags nr. 8545
Dok. nr. 1014805

Postboks 269
3900 Nuuk
Tlf. (+299) 34 50 00
Fax (+299) 34 63 55
E-mail: apnn@nanoq.gl
www.naalakkersuisut.gl

Naalakkersuisunut apeqqut:

1. Ukiorpassuarni aalisartuusimasut angallatip isaterneranut atatillugu aalisarnermut akuersissummik arsaarneqartarnerat sumik/sunik peqquteqarpa ?
2. Inuit ilaat inuunertik tamaat aalisarnerinnavimmik inuussutissarsiuteqarsimasut, apeqqut 1-imi pissutsit tunngavigalugit akuersissummik paaaffigisaasimasut inuit pisinnaatitaaffiinik paaaffigineqartutut nalilerneqarsinnaappaat ?
3. Sooq-una qeeraq 4 kg-miit oqimaannerusooq Royal Greenlandip tunisassiorfiinut tunineqarsinnaanngitsoq ?
4. Aalisakkat allat suut angivallaarnertik pissutigalugu RG-p tunisassiorfiinut tunineqarsinnaanngillat ? aamma suna/suut peqqutaappat taamaattoqarneranut ?
5. Aalisartut ilaasa tunitsivissaqannginneq pissutigalugu kilometererparujussuit atorlugit illoqarfinnut allanut tuniniaasariaqartarnerat Naalakkersuisut akuersaaginnarsinnaava-at ?
6. Naalakkersuisut qanoq iliuuseqarniarpat tunisinermi pissutsinik pitsanngorsaaniarlutik?
7. Sooq-una kapisillit aalisakkerivinnut tuneqqusaajunnaartut ?

1-imut akissut:

2009-imiilli sinerissap qanittuani aalisariutit aserortertinnissaanut tapiissutinik qinnuteqarnissamut periarfissaalersimavoq. Aalisariutit aserortertinnissaanut tapiissutit periarfissaalersimapput aaqqissuusseqqinnerup kingorna. Suliniutip siunertarisimavaa, aalisariutit amerlassusaat Kalaallit Nunatsinni piffissami pineqartumi peqassutsimut nalimmarsarneqarnissaat.

Ingerlatitsiveqatigiiffinnut imaluunniit aalisartunut aalisarunnaarusuttunut aserorterisitsinermut tapiissutit iluaqutaasussatut aaqqiinerupput, tassami tapiissusitigut periarfissaalermat aalisarnermit tunuartersinnaaneq aningaasatigut annertuumik annaasaqarnani. Tapiissutinik eqqussinerup aamma kingunerisussaavaa aalisariutit ikilinerisigut aalisartuni sinneruttunut iluaqusiinissaq.

Tapiissutinik pissarsisinnaaneq nammineq aalajangerneqartussaavoq. Qinnuteqartunut ataasiakkaanut nammineq aalajangiiffiusussaavoq tapiissutinik qinnuteqartoqassanersoq.

Piumasaqaataavoq aalisarnermut akuersissut aserorterinissamut qinnuteqartumut aalisarsinnaanermik akuersissut atorunnaarsinneqassasoq tapiissutit pissarsiarineqarpata.

Uggornartoqartippara apeqqutigineqartup atuutilersinneqarnerani Naalackersuinikkut akisussaani nalaani aalajangiussa ilisimasimangikkit. Matumani ilisimatitsissutigissavarput Naalackersuisut allannguutissamik siunnersuuteqarmata inatsisartut ataatsimiinnissaanut suliarineqartussamik.

2-imut akissut:

Akissut 1-imi taakkartorneqartumut innersuussillunga periuseq aalisartumit nammineerluni qinnuteqarneratigut pisussanngortinneqartarpoq. Matumani aamma ilisimatitsissutigineqassaaq Naalackersuisut allannguutissamik siunnersuuteqarmata inatsisartut ataatsimiinnissaanut, tassa siunnersuummiippoq malittarisassat sakkukillillugit aalisarsinnaanermut akuersissutinik atorunnaarsitsisarneq tapiissutinik pissarsinikkut pisartoq atorunnaarsinneqarnissaa.

3-imut akissut:

Qeeqqat angisuut Royal Greenland-ip naliginnaasumik qerinarsuartitsiivinit angivallaarput, taamaallaallu supoortumik qerititsivinni qerisinneqarsinnaallutik(IQFindividual quick frozen).

Sumiiffinni Royal Greenland-ip qerinarsuartitsisarfiini siusinnerusukkat qeeqqat angisuut Royal Greenland-ip qerititsiviinut ilineqartarsimapput, taamaasilluni ullormi ulluniluunniit marlunni qeritinneqartarlutik. Periuseq tamanna inuussutissalerinermut oqartussanit sakkortusaaffigineqarsimavoq taamannallu periuseq atorneqarunnaarsimalluni, tamatumap kingorna ajornartorsiut pilersimavoq.

Royal Greenland-ip qeeqqat angisuut tigoorarsinnaavai aalisakkallu angisuut allat tunitivinni 17-ini tunitiviit 36-iusuni tigoorarsinnaavai.

4-imut akissut:

Ajornartorsiut aalisakkanut allanut taannaaginnarpoq akissut 3-imi akissutigineqartumullu assiulluni.

5-imut akissut:

Ilumoorpoq aalisartut ilaat ungasissumut ingerlaaqqaarlutik pisatik tunisinnaasarnerat. Tamanna immikkut pisarpoq piffissamit piffissamut, tassa qerititsiviit ulikkaarnerisigut imaluunniit tunitsiviit piffissami sivikinnerusumi atortutigut ajornartorsiuteqarnerini. Ajornartorsiutit pineqartut ulluinnarni ingerlatsinermut attuumassuteqarput, Naalakkersuisut ulluinnarni ingerlatsinermut akulerunneq ajorput.

6-imut akissut:

Naalakkersuisut anguniagaat tassaavoq aalisakkat nunatsinni naleqarnerulersissallugit tunisassiarineqartarnissaat. Taamaattumik Naalakkersuisunit piumasarineqarpoq saarullittassiissutigineqartut amerlanersaat nunami tunisassiarineqartassasut. Tamanna sinerissap qanittuani, Kitaata avataani misileraalluni saarullinniarnermi kiisalu Tunumi pisassat amerlanersaannut saarullittassanut atuuppoq. Nunatta kitaata avataani saarullittassiissutigineqartut tulaanneqartussaatitaapput piumasaqaataallunilu saarulliit tisallugit tunisassiarineqartarsimassasut. Saarulliit tulaanneqartussaatitaanerisa kinguneriisaanik nunami tunisassiorneq ataavarteq suliffiillu ataavartut qulakkeerneqartarput, tunisassiorfiit sinerissap qanittuani saarullinniartut tulaassarisinnaasaat kisiisa isumalluutigunnaarlugit.

Naalakkersuisut nalilerpaat aalisakkanik tunisassiortut siunissamut ungasinnerusumut tunisassiassaminnik pilersaarusiornissaminnut periarfissaqartinneqalerpata, aalisartunit tunisisinnaaneq aalaakkaanerusunik pilersitsinissamik tamanna kinguneqassasoq.

7-imut akissut:

Kapisillit atlantikup avannaaneersut inissisimanagerat pitsaanngilluinnarpoq, ICES-illu inassutigaa ukiuni pingasuni tulliuuttuni (2015-2017) Kalaallit Nunaat kapisilinniassanngitsoq. Kalaallit Nunaat taamaalilluni nunanit tamalaanit annertuumik tatineqarpoq, tassa kalaallit kapisilinniartarnerat "aalisakkanik assigiinngitsunik akuleriissitsilluni" aalisarnermik taaneqartarmat, imaappoq kapisillit pingaartumik USA-mit Canadamillu pisuusunit kuunniit assigiinngitsunit aggersuusarmata, tassani annertuumik ajornartorsiutigineqarpoq kapisillit kuunnut pinngorfimminnut suffiartorlutik uternej ajorput taamalu amerliartoratik.

NASCO-mik isumaqatigiissut naapertorlugu Kalaallit Nunaanni taamaallaat nunami atugassanik kapisilinniartoqarsinnaavoq – tassa nammineq atugassanik aalisarnermik taaneqartartoq. Tamanna isumaqarpoq, isumaqatigiissut aqqutigalugu pisussaaffeqarneq kapisilinnik avammut tunisaqannginnissamut aamma nammineq atugassaannarnik aalisarnissamut.

Ukioq manna siusinnerusukkut ukiumoortumik ataatsimiinnermi Kalaallit Nunaata Kitaa pillugu Ataatsimiititaliami susassaqtut Kalaallit Nunaanni kapisilinniarneq pillugu ukiunut pingasunut (2015-2017) aqutsinissamik nutaamik isumaqatigiissuteqarput. Isumaqatigiissutip imarisaanik pisassat 45 tonsinik amerlassuseqassapput aammattaaq nalunaarusiortarnerup aalisarnerullu nakkutigineqarnerata pitsaanerulersinneqarnissaannik Kalaallit Nunaata pisussaaffilerneqarpoq.

Pisassat annikinneri pissutaatillugu Naalakkersuisut aalajangersimapput ukioq manna inuussutissarsiutigalugu aalisartut taamaallaat kalaalimineerniarfinnut, paaqqinnittarfinnut, unnuisarfinnut ilaalu ilanngullugit tunisisinnaassasut kiisalu tapertaralugu aalisartut namminneq atugassaminnik taamaallaat aalisarsinnaassasut.

Naalakkersuisut pisunut malinnaaniarput aamma nalilersussavaat Nalunaarummi killiliissutit ilaat sakkukillisarneqarsinnaanerat.

Karl-Kristian Kruse

Naalakkersuisoq